

續修陝西省通志稿

第七十七冊

卷一百五十一至一百五十二



續修陝西通志稿卷一百五十一

金石十七

唐

石忠政墓誌銘

存長慶二年文錄

石方一尺二寸一十四行行二十五字正書石裂爲五片

唐故石府君墓誌銘

并序

府君曰忠政字不邪生于京兆府萬

年縣人也邑崇仁里清閑不仕自居其家昏何氏不幸元和二年四月逝葬城西小巖村府君壽八十有二終于長口二年七月十日以其年八月二十二口亦葬于小口村長子義後亡亦葬於口口口口元年當家口口口口鄉南姚口口掃灑莊一所遂再口口口厝莊東南口十步已來遂擇吉晨以其年八月九口口附翁婆及兄義並安于墳闕乃命口口存之不朽銘曰 八月口口

風悲切安厝先靈歸墳闕口口孝感理於天萬代子孫昌不口

按此石昔藏渭南趙氏字跡草率安作安歸作湍聞光緒二十

八年亦歸陶齋

梁守謙功德銘

存長慶二年見王氏金石萃編

碑高一丈五寸七分廣五尺三分四十六行行八十八字楊承和撰并正書陸邛篆額在西安府碑林

此宦者梁守謙造經於興唐寺而護軍中尉楊承和爲銘之書之者也頌宦者功德乃謂淮蔡之功十居其七將令裴李諸公

何處生活

趙氏石墨鐫華

邠國公者內侍梁守謙也攷之唐史宦者守謙無傳惟憲宗十五年書帝暴崩于太極殿中尉梁守謙王守澄等共立太子殺吐突承瓘及澧王惲而韓文公平淮西碑亦載守謙在帝左右嘗命之撫蔡師夫守謙以一宦者而爵至上公此可見憲宗之

信任小人宜其晚節不終卒此宦者之手然則予之錄此蓋將爲天下後世之戒而非徒取其文字也

祁氏金薤琳瑯

右邠國公功德銘楊承和爲文而書之承和一閹人耳安能工於文詞且書法精妙乃爾殆當時文士游中官之門者爲之假手也守謙以元和十三年充右軍中尉至大和元年三月始致仕以王守澄代之蓋典禁軍者十年故穆宗文宗之立皆預定策功唐書宦官傳劉克明弑敬宗樞密使王守澄楊承和中尉梁守謙魏從簡與宰相裴度共迎江王發左右神策軍及六軍飛龍兵討之承和事見於史者惟此耳碑以尺晏爲尺鷁葛篆爲芻豢皆異文

錢氏潛研堂金石文字跋尾

韓愈平淮西碑稱守謙出入左右命撫蔡師碑中云蔡人迎戎命公撫衆與之正合守謙於興唐寺寫經爲國祈福故立此頌

碑末云天水強瓊摹勒并刻字強瓊亦中人見其妻王夫人墓
銘碑額已失文獻通考唐六譯金剛經恒農楊翺集中貴人楊
承和集右軍書刻之興唐寺亦是其時所爲

畢氏關中金石記

范傳正女阿九墓誌銘

佚
長慶三年

原石破碎不詳尺寸鄉貢進士范嚮述正書

誌略云皇光祿卿贈左散騎常侍順陽公次女字阿九年十六
以長慶二年十二月十九日疾終于京兆長興里明年四月十
三日窆於國之東隅白鹿原之別業案此石今未詳所在矣

新唐書列傳云范傳正字西老鄧州順陽人父憐爲戶部員外
郎與趙郡李華善有當世名傳正舉進士宏辭皆高第授集賢
殿校書郎歷歙湖蘇三州刺史有殊政進拜宣歙觀察使代還
改光祿卿卒贈左散騎常侍此誌所謂順陽公即范傳正也惟

傳中未載順陽公封爵得此可補其闕焉又傳正觀察宣歙時嘗爲李白遷葬當塗之青山又爲立碑誌墓恤其二女孫免其女孫夫家之徭役其人殆賢者也事詳傳正自撰李公新墓碑

銘中

毛氏關中金石文字存逸攷

尊勝陀羅尼經幢并記

存長慶四年

原石未見不詳尺寸沙門國威述正書

光緒五年博山張竹西大令培之訪得此幢於永壽縣東南鄉好留里桃源村題云大唐京兆府好畤縣鎮爲國敬造尊勝陀羅尼幢一所題名有右神策軍好畤鎮遏兵馬使朝散郎檢校太子右諭德兼殿中侍御史王從矩監軍使朝議郎行內侍省內府局令員外置同正員上柱國王文幹都虞候金紫光祿大夫檢校太子詹事兼侍御史上柱國史惟畧又一行云朝議郎

權京兆府好時縣令飛騎尉鄴縣開國男蕭什等名案方輿紀
要云唐武德二年分醴泉縣置好時縣屬雍州貞觀二十年改
置上宜縣旋復曰好時貞元以神策軍分屯近畿此爲好時鎮
此幢題爲好時縣鎮與方輿紀要合

毛氏關中金石
文字存逸致

尊勝陀羅尼經幢

佚寶歷元年

原石未見不詳尺寸釋惟淨等造

寰宇訪碑錄云釋惟淨等爲師應澄造咸寧縣志云在馬頭空

今未詳所在矣

毛氏關中金石文字存逸致

尊勝陀羅尼經幢

存寶歷元年見王氏金石萃編

七幢高五尺一寸八面僅存四面廣各五寸共二十六行經每行
七十字銘則四十七八字不等曹口口正書在終南山樛梓谷

長安縣志作大德惠澄經幢云在樛梓谷隋唐石刻拾遺云在
終南山後有銘并序爲湛大師之弟子頌師而作門人國珍智

藏列名者二十人 毛氏關中金石文字存逸攷

張侔墓誌銘

佚 大和二年見關中金石文字存逸攷

石佚未詳尺寸盧從儉撰文韓達分書

誌略云君諱侔字侔其先北地貴強族也曾王父栖巖皇平州
刺史大父瓌皇龍崗節度邢洺觀察使邢洺生道晏皇左散騎
常侍兼御史大夫涿州刺史公即涿州第三子公之元舅司徒
高公諱霞寓常隨族父崇文平劍南西川寇難論功第一徵拜
衛將軍尋授振武軍節度使又轉唐鄧邠寧慶等道節度使以
公孝敬忠節可口戎事而曰吾之宅相其在爾乎因推頰輔之
恩委以牙門之任歷職既久官秩屢遷以大和三年八月十一
日終于沔王府諮議參軍年四十四夫人清和崔氏有子一人
曰憲郎公之內弟右威衛將軍扶即司徒公之元子也爰悉家

財式護窀穸以其年十月廿三日窆于萬年縣崇義鄉南姚里
蓋從宜也 此石道光時出土爲涇陽縣尉吳縣姜君榮所得
今未知移徙何處矣誌言侔之大父爲龍崗節度邢洺觀察考
新唐書地理志龍崗爲邢州附郭縣又考方鎮表邢洺二州隸
昭義節度而龍崗之立節度邢洺之設觀察方鎮表均無明文
得此可補其闕高霞寓新唐書有傳誌中所載霞寓官階皆與
傳合沔王名郇憲宗子見十一宗諸子傳書志之韓遼名見宰
相世系表中

毛氏關中金石文字存逸攷

梁守謙墓誌銘

存文錄後
大和二年

石方二尺八寸四十八行行四十八字雷景中撰文并正書

唐故右神策軍護軍中尉兼口口口口口口府儀同三司行右衛
上將軍知內侍省事上柱國邠國公食邑三千戶食實封三百戶

贈揚州大都督安定梁公墓誌銘

并序

朝請郎前試大理評事

上柱國雷景中撰并書

嶽降靈粹時生哲人運契休明光輔口

德暨入掌綸誥出平寇戎使妖氛廓清建功業廣大者安定梁公也丁公諱守謙字虛已姓標令族代不乏賢擢居元臣班列獨步曾祖晟皇任左清道率府長史祖希倩皇任寧遠將軍翊衛中郎將父庭皇高道不仕咸以大口口修令名隱居莅官皆陰德濟物玄慶不泯素風霽然公則嗣其後也爰自弱冠節行孤高起登內朝便處要地貞元末解褐授徵事郎內府局令充學士院使公藝業精通器宇沈邃性不苟合發言成規元和初進階宣義郎遷掖庭局令監琳瓊杞梓之士賜銀章朱紱之寵依前院使憲宗以文明御宇知翰苑勤勞四年加朝議大夫拜內常侍錫金紫之命授正議大夫愬樞密之任自統握大柄謀猷日新方隅乂安兇醜屢

滅綱紀中外弼諧聖明至公無私環海清謐十一年丁內艱茹毒
銜哀泣血過制以其內相權重奪情起復授忠武將軍知省事公
識度寬明機智深遠潔白廉退口之古人其年冬詔徵天下之師
討淮蔡之師監統之選不易其人藉公良籌膺此殊任進階加雲
麾將軍充行營招討都督時闔外之事委公裁之威肅令嚴將校
知禁明年夏五月拔鄆城降叛卒賊勢旣挫皇威益張撲滅可期
詔命口闕口秉機務再口盛朝冬十月蔡之元兇果就擒獲俘馘
上獻氛埃蕩銷此時天兵猶未卸甲公又銜命暫統師口甄叙戰
功勸賞在手駟騎所至道路風生殘孽餘兇皆感恩宥復命十三
年加冠軍大將軍遷右監門衛上將軍尋拜口口口軍護軍中尉
朝望益重勳庸轉高厚德深仁天下欽服公素蘊宏略初權禁戎
恩信不虧進獻無闕十五年拜特進列戟朱門渥澤逾盛繇是實

其府庫精以戈甲警巡撫禦靡不親躬十五年遷驃騎大將軍兼
右武衛上將軍時皇帝昇遐宗社未定公首冊儲貳肅清宮闈又
加寵命長慶元年封安定郡開國公冬十月西戎犯邊詔下左右
神策兼京西諸道兵馬討焉拜公爲監統乃精選良將訓練銳師
大戎畏威惴惴奔北二年封邠國公食邑三千戶四年拜開府儀
同三司兼右衛上將軍公捧日從龍偏承聖旨儉德守道家無餘
財竭俸傾心修建功德不以壽終爲諱於大塋側創置先修栽植
松楸樹立碑記君子謂之達觀也洎敬宗嗣位夏四月小孽猖狂
凌犯帝座公卽日掃蕩以靜皇居忠憤昭彰勲績廣茂二年冬彗
起蕭牆禍生宮掖潛龍未震神器不安公引兵誅夷旋定社稷功
高前列位冠內庭加實封三百戶大和元年春公朝對之暇嘗謂
朋從曰夫寵辱若驚功成身退苟順天心必全其真因迴止足之

心頓起滿盈之誠願保冲素不顧浮榮遂陳表章懇讓權位皇帝
嘉歎累答天書褒德贊功三請未許公尋進車馬服用便與將校
言別一軍號慟聲徹九重臥轍攀轅如喪父母蓋恩信慈惠感人
之深故也明日將赴朝謁披露血誠冒觸宸嚴固乞休退上引其
帶礪之誓念以翼輔之功省表獻歔難輟斯任公再陳哀迫方遂
深衷君臣銜悲相顧流涕聖心重惜如失股肱此日勅又令班列
大臣咸送到私第歸休之盛千載一時公歷侍六朝每立殊績名
位雖退恩榮不渝翌日拜右衛上將軍致仕特加全祿賜錢帛粟
麥寵命優崇榮耀里閭光載史冊追二疏之遐躅慕陸賈之高名
優遊林泉多在別墅前後賜御藥寶器凡九降天使恩亦至矣豈
料天不福善忽罹于殃以其年冬月廿日暴薨于永昌里之私第
享年四十有九嗚呼帝道克昌元臣遽沒乾綱載定一柱俄傾天

子輟朝郡人罷市追懷痛惜倚賴無期追贈揚州大都督寵其逝也賚布帛之外別賜錢一百萬以備齋七之給夫人南陽韓氏以令淑溫和合作琴瑟婦道豈睦母儀肅嚴早受恩榮封號冀國每起撤帷之慟猶懷舉案之儀痛切崩城追攀不及令子五人長曰承敏任朝散大夫掖庭局令賜緋魚袋次曰承度任朝議大夫宮闈局令賜緋魚袋充沂海監軍仲曰承乂任朝議郎內府局丞仲曰承汶賜緋魚袋幼曰承政賜綠皆玉潤貞姿博通群藝忠孝雙美聲華並馳不墜清風克奉嚴訓自丁艱疊號哭無時雖執三年之喪竟佩終身之感有女二人長適太原郭氏親弟一人曰守志任原王府司馬兼侍御史恭而且悌禮義修身揮涕踴哀同護喪葬大和二年二月二十三日龜筮叶吉將窆于京兆府萬年縣李姚村白鹿原先修塋禮也鹵簿儀仗所司備供感春色無光路人

掩泣送終之飾亦冠絕當時嗣子以景中久踐門闌粗諳事實恐陵夷谷變因命爲文輒課虛懷無慚直筆銘曰 嶽瀆降靈賢人誕生孤標令德翊戴文明少負公才早登翰苑鯁鬚雖化驥足未展密近旒宸從容掖垣偏承睿渥獨掌綸音始佩銀章旋紆紫綬秉持樞要匡建在手帝命監統籌能濟時鄆城將拔遽滅淮夷出仗皇威入權禁旅恩霑品物義振區宇位極開府功高護軍底寧宮闕掃蕩妖氛祇事六朝策名二紀道齊德喪榮保終始每味玄寂常嗟俗塵崇修梵宇廣樹良因寵辱若驚勳庸不恃朝車請退賢路求避屢獻章表懇辭官榮泣離丹陛悲動皇情旣遂休閑隱居別墅優遊泉石纔變寒暑天意不憖禍殲忠良俄然遘疾奄爾薨亡天子輟朝股肱如失大厦棟傾巨川舟沒痛結親愛哀纏里閭風悲總帳日慘轎車鬱鬱佳城蕭蕭寒柏萬古千秋紀在貞石

按梁守謙一刑餘之人耳其生也開府儀同三司邢國公食邑三千戶其卒也九降天使輟朝罷市賜錢一百萬前之功德碑後之墓誌銘鋪張揚厲其助幾與房杜相埒積習相沿欲不受制於家奴其可得乎此石近時出土見藏長安段氏

西平郡主李晟碑

存 大和三文見王氏金石萃編

碑連額高一丈四尺二寸廣五尺八寸三十四行行六十一字
裴度撰文柳公權正書并篆額在高陵縣本祠

右唐李晟碑裴度撰碑載西平子十二人願聰總慙憑恕憲慙懿聽甚慙唐史宰相世系表所書亦同而新舊史列傳皆云晟有十五子舊史云侗仙皆無祿蚤世豈以侗等早世故碑不載歟又李名撰李聽碑云西平有子十六人疑有未名而卒者爾元和姓纂載西平子十人以碑校之姓纂缺聰總憑懿四人而怵應二子墓碑舊史皆無之又其倫次差謬亦當以碑爲正

趙氏

金石錄

予舊未見此碑近始見之字雖剝落然一段挺拔不群之概尙可捫而得也王元美不滿晉公之文謂西平之子皆逝獨太保聽存乞文於晉公然此碑列銜云臣裴度奉勅撰予以爲奉命之作固自有體西平之功赫著人間何可過爲鋪張不爲人主地元美見不及此矣嘗見蘇子瞻著溫公碑累累數萬言卒來忌者之口溫公竟不能有其碑此千秋之炯鑒也

庚子消夏錄

碑文簡畧不及史傳敘事之詳惟云乾元初客武都值酋豪以缺守遘亂殺掠平人公與所從十數馳而射之殪其爲魁者餘黨遂遁寇所虜獲積如邱山公一無取惟椎牛醺酒享士而去邦人具狀以聞特拜左清道率則新舊史俱未之載也晟祖思恭洮州刺史父欽左金吾衛大將軍今南監本汲古閣本唐書